



Radio Rumantsch

## Per trutgs e pitgognas

### Proposta dad Ursina Ganzoni

#### Tura Crap Putêr

Tarasp Fontana (1440 msm) - God Plan - Alp Laisch - Crap Putêr (2363 msm) – Mottana – Vallatscha – Tarasp

Durada: 6 uras  
Differenza d'atezza: 920 m

Partenza a Tarasp Fontana, da là sa mett'ins sin via vers Val Plavna. Bainspert fa ins però la storta si vers God Plan e prenda la senda che maina fin tar la resgia. Da là davent tschern'ins puspè la via d'alp per vegnir sin l'Alp Laisch.

Da là storsch'ins a dretga ed arriva en il guaud. Tar la spatla da Mottana storsch'ins puspè a sanestra. Sur il guaud vegni in pau stip e grippus. Ma surventschend quai vegn ins bainbaud sin il mut: Crap Putêr.

Per turnar tschern'ins l'emprim la medema senda fin a Mottana. Suentar sa mett'ins sin via vers Vallatscha e Tarasp Fontana.

#### *Spezial vi da quella tura:*

Spezial è segir il chastè da Tarasp che regia e splendura sur la cuntrada.

La senda da God Plan è amabla ed in pau misteriusa.

Alp Laisch cun sia vista giu per l'Engiadina Bassa è adina in lieu fitg spezial.

Crap Putêr è in mut plat, situà pli enavant ch'ils auters muts. Cun quai ins ha da là davent ina bella vista fin Piz Ras da Susch e fin tar il Kleinmutz (Austria) che serra la val. Da qua davent han ins er la vista sin ils craps e lieus da cult, che han existì en Engiadina Bassa durant il temp da bronz (ca. 1200 a.C.). Quai èn ils Craps da las strias ad Ardez e Sgné, Russonch, sur Scuol e Mottata Ramosch. I na è betg cumprovà che quai era in lieu da sacrificis, ma segir in lieu per far signals da fieu.

Turnond vers Vallatscha pass'ins anc sin il punct da Mottana, er cun bella vista giu per la val. Il guaud da Taus è in pau stgir. Faschond tut las stortas da la senda chamina ins fin giu tar la prada da Vallatscha. I va però anc in detg toc e temp per arrivar a Tarasp Fontana.

#### *Equipament*

- Satgados cun avunda bavrondas e marena
- Chalzers e vestgadira da viandar, protecziun da sulegl e plievgia

Quella tura po ins er far cun uffants che chaminan gugent.

Ustarias chatt'ins a Tarasp Fontana ed Alp Laisch.